

**Govor predsjedatelja Povjerenstva za ostvarivanje ravnopravnosti spolova
Zastupničkog doma Parlamentarne skupštine Bosne i Hercegovine Mirsada
Isakovića na Simpozijumu o sudjelovanju žena u mehanizmima odlučivanja**

Ankara, 1. studeni 2017.

"Poštovani,

Veliku prepreku ravnopravnoj zastupljenosti žena u političkom životu Bosne i Hercegovine predstavlja nedovoljna podrška političkih stranaka ženama-članicama u izradi političkih programa i političkoj afirmaciji.

Određeni, manji broj političkih stranaka je u svojim aktima definirao svoje obaveze s ciljem postizanja jednakosti i ravnopravnosti spolova u praksi.

Međutim, još uvijek postoji tradicionalan pristup položaju žene i uspostavljeni obrasci ponašanja i odnosa u društvu koji, uz nedovoljne zakonske propise, utiču na podzastupljenost i nedovoljno učešće žena u javnom životu kao i na mjestima donošenja odluka.

Bez ravnopravnog položaja žena i muškaraca nema istinske demokratije niti prosperitetnog društva.

Zbog toga, s pravom možemo reći da je od suštinskog značaja za bosanskohercegovačko društvo u cjelini ravnomjerno učešće i podjela odgovornosti žena i muškaraca u javnom životu i prilikom donošenja odluka, kao što je definirano Zakonom o ravnopravnosti spolova u BiH. Pitanje ravnopravnosti spolova u Bosni i Hercegovini mora postati dio svake progresivne politike, na svim nivoima i u svim sferama.

Neophodna je integracija međunarodnih i domaćih standarda za ravnopravnost spolova, kao obaveza kojima se direktno ili indirektno regulira ravnopravno učešće u javnom životu, uključujući učešće u zakonodavnim organima, izvršnoj vlasti, javnoj upravi, sudstvu i diplomatiji.

U Bosni i Hercegovini žene su i dalje manje zastupljeni spol, u zakonodavanoj vlasti na svim nivoima i u prosjeku zastupljenost ne prelazi Zakonom utvrđenih 40%.

Parlamentarna skupština Bosne i Hercegovine broji 42 zastupnika/ice. Od tog broja samo je 10 žena zastupnica, odnosno 24%.

U Vijeću ministara Bosne i Hercegovine, kojeg čine premijer i devet ministara, imamo samo dvije žene, odnosno 20% žena.

Komisija za ravnopravnost spolova pokušava kroz izmjene Izbornog zakona BiH uvesti tzv. sistem "zatvarača", kojim bismo uveli jednaku i naizmjeničnu zastupljenost oba spola na kandidatskim listama. Ali ni to nije garancija da će biti izabran zakonski minimum žena u parlament, budući da mi imamo sistem otvorenih lista sa preferencijalnim glasanjem.

Takodjer predlažemo i izmjenu Zakona o Vijeću ministara BiH kojim nastojimo uvesti „rodnu kvotu“, po kojoj u Vijeću ministara oba spola moraju biti zastupljena sa najmanje 40%.

Mjera koju smo ranije uveli jeste davanje novčanog bonusa za rad klubova poslanika parlamentarnim strankama koje imaju žene izabrane u parlamentu.

Generalno, ako napravimo poređenje sa stanjem u drugim zemljama, možemo reći da je Bosna i Hercegovina u prosjeku zemalja – članica Evropske unije, što i nije loše. Ali ako želimo u cjelosti ostvariti principe rodne ravnopravnosti, smatram da nas čeka još dug put do njihovog ostvarenja.

Zbog toga nam je iskustvo drugih zemalja dragocjeno i zato pozdravljam održavanje ovog simpozijuma i zahvaljujem domaćinima na gostoprimstvu, te srdačno čestitam 8. godišnjicu rada Komisije Velike narodne skupštine Republike Turske". (kraj)